

## **Diehtjuohkin almmolaš ásahusaide mo sámi leavgga galgá geavahit**

### **Sámi álbmotbeaivi lea dál almmolaš leavgabeaivi Norggas. Almmolaš ásahusat ávžžuhuvvojit maiddái levget sámi leavggain sámi álbmotbeaivvi guovvamánu 6. beaivvi.**

Cuoŋománus 2003 rievddadedje lága nu ahte sámi leavgga geavaheami birra čielgasit čuožžu [lágas mii guoská gielddaid almmolaš visttiid levgemii](#). Gielddat ja fylkkagielddat sáhttet ge dalle geavahit sámi leavgga juohke dilálašvuodas. Gielddat ja fylkkagielddat mearridit ieža háliidit go geavahit sámi leavgga, ja man ollu. Sáhttet dušše sámi leavgga geavahit, dahje oktanaga Norgga leavggain. Dušše almmolaš leavgabeivviid fertejit stáhta visttit levget Norgga leavggain oktanaga sámi leavggain. Eará allaígásaš oktavuodain go almmolaš leavgabeivviid sáhttet levget dušše sámi leavggain maiddái stáhta visttiin.

Sámiráddi dat lea dohkkehan [sámi leavgga](#) ja mearridan [sámi leavgabeivviid](#). Mii guoská leavgga geavaheapmái Norggas, lea Sámediggái addon váldi [sámelága § 1-6](#) vuodul mearridit dása lálkaásahusaid. Sámediggi áigu addit dákkár ásahusaid 2004:s. Dassá gustojit dat njuolggadusat maid Sámediggi mearridii [áššis 43/01](#). [Sámediggi](#) lea eiseváldi mii gieđahallá gažaldagaid sámi leavgga geavaheami birra.

### **Gielddaid ja fylkkagielddaid rutiinnat sámi leavgga geavaheamis ja sámi álbmotbeaivvi ávvudeamis**

Mánja gieldda leat jo muhtun jagiid sámi álbmotbeaivvi ávvudettiin levgen sámi leavggain. Sámegiela hálddašanguovllu buot guđa gielddas (Karášjoga gielddas, Guovdageainnu suohkanis, Unjárgga gielddas, Porsánnggu gielddas ja Deanu gielddas Finnmárkkus ja Gáivuona gielddas Romssas) leat sierra mearrádusat ja dagalduvvan vierut mat gusket sámi leavgga geavaheapmái. Ovdamearkka dihtii levge Divttasvuona gieldda Nordlánddas buot sámi leavgabeivviid. Gáivuona gieldda Romssas lea mearridan levget sámi leavggain njealji sámi leavgabeaivvi, ja vel go lea sámediggeválgga ja go Sámediggi ásahuvvo juohke njealját jagi. Beardu suohkan Romssas lea mearridan ahte galgá levgejuvvot sihke Norgga ja sámi leavggain sihke miessemánu 17. beaivvi ja guovvamánu 6. beaivvi.

Romssa fylkkas levgejit sámi leavggain buot fylkkagieldda leavgastákkuin sámi álbmotbeaivvi. Fylkkamánne ávžžuha reivvestis fylkkagieldda ásahusaide, joatkkaskuvllaide ja bátneklinihkaide levget sámi álbmotbeaivvi. Finnmárkku fylkkas levgejit golmmain leavggain fylkkavistti olggobealde Čáhcesullos go lea fylkkagieldda čoahkkin. Norgga leavga gessojuvvo bajimusas, ja sámi leavga ja fylkkagieldda leavga čuvvot vuollelis. Sámi álbmotbeaivvi levgejuvvo sámi leavggain.

Sámi álbmotbeaivvi 2003 lágidii Oslo gieldda [levgema sámi leavggain](#), ja sátnedoheaddji ja Oslosámiid áirasat dolle sártniid, ja guossohuvvui iditborramuš bovdejuvvon gussiide, ee. Sámediggepresidentii ja gielldaministarii. Guvttiin leavggain levgejuvvui Ráddeviesu šiljus.

Loga raportta ”Sámi álbmotbeaivi almmolaš leavgabeaivin” jus háliidat eanet dieđuid ja čilgejumi daid gažaldagaid birra mat gusket sámi álbmotbeaivái almmolaš leavgabeaivin ja sámi leavga geavaheapmái.